

四庫全書

史部

欽定四庫全書

汴京遺蹟志卷十一

明李濂撰

祠廟庵院

祠

三賢祠

在吹臺上禹廟之後舊有三龕塑碧霞元君像正德丁丑巡按御史毛伯溫改塑三賢像

毛伯溫撰三賢祠記

三賢祠者祠唐高李杜三

賢於吹臺之上也按唐史高適李白杜甫天寶中聚梁宋間共飲吹臺之上酒酣擊歌俛仰今古旁

若無人而杜詩亦云憶與高李輩論交入酒壚兩
公壯藻思得我色敷腴氣酣登吹臺懷古視平蕪
是時白甫皆以讒嫉去國年各四十餘而適則封
丘尉耳三人者固蓋世之豪也顧坎坷徘徊行歌
古墟榛莽中使其登臺悲嘯望芒碭數雁驚嗚呼
傷哉白梁園歌適古大梁行豈亦其時詩歟詩李
杜尚矣適詩慷慨悲壯爲盛唐諸人冠而杜子亦
時時推適曰美名吾不及佳句法如何蓋飄然不

羣之外推者適一人耳適五十始詩故叙年李杜
之上其詩頌二子故並賢之而並祠之吹臺故有
禹宮宮之後有空室而棲非其鬼伯溫業令撤其
鬼而祠三賢矣今年秋偕蜀張子關西袁子李子
謁焉登臺四望曠原孤城日涼雲斷風颯颯起黃
蘆未搖軒振檣予與三子者灑然驚回思三賢又
愴然悲曰適顯矣白甫乃如斯已邪傷哉傷哉

包孝肅公祠

包拯希仁嘗尹開封有異政厥後汴人思
之立祠于府治廳事之北始建歲月無考

國朝成化間知府孫瑜徙
建于府治之東隅隙地

胡謐撰邑孝肅公祠記

開封府故有宋邑孝肅

公祠蓋祀其知開封時功也前後公知是府者多
名人奚獨祀公蓋公其尤也公所歷諸官皆有績
奚獨祀公知府功蓋開封京府其功可以該諸績
也惟公之在開封也剛毅不阿貴戚宦臣爲之斂
手猶若居御史諫議之所論斥而且開門聽訟吏
不敢欺即廣其知天長時斷割牛舌訟之明也刻

毀勢家侵惠民河園榭即推其轉運河北時請以
牧馬地賦民之惠也自奉儉約無異布衣誠子孫
不得犯贓罪即充其知端州時歸不持一硯之操
也與夫知瀛州而請罷回易在三司而置場和易
以免民供上之物皆由京府以達諸外郡者也然
則公敷歷中外之績舉於是乎該矣故京師爲之
語曰關節不到有閻羅包老人以其笑比黃河清
童稚婦女亦知其名呼曰包待制云比卒太常乃

併其親老不赴調親沒廬墓之行謚曰孝肅蓋實
法所宜祀者此開封所繇以祀公也而當時知是
府者前公如陳文惠康肅兄弟繼尹薛簡肅威嚴
如之後公如歐陽文忠呂正獻濟以寬簡然皆爲
他善所掩其知是府功則莫與公者此開封所以
獨祀公也祠在府治廳事北創始未詳歲月歷金
元以迄我朝府列外郡祀事歲脩不廢祠則屢葺
乃成化癸巳前知府孫侯瑜以址隘宇將壓相得

府治巽隅隙地遂徙建焉工未就緒而孫侯卒今
知府張侯岫至亟繕完之中爲屋三間左右翼兩
廂各三間前墜門樓周繚以墉肖公像其中黝堊
髹漆煥然一新張侯手署其扁曰邑孝肅公之祠
爰率僚佐落之而告慰公神如禮每春秋用牲醴
致祭著爲儀且裒公遺事奏議載鋟以廣傳焉其
尤知慕公者哉僉謂斯舉不可無記以告將來張
侯屢以爲請予因述開封所以祀公之意俾人知

公之功不獨在開封也

十賢祠

即大梁書院之前堂也在繁臺之上舊名九賢祠祀濂溪二程張邵司馬朱呂張後復益以許

魯齋爲
十賢祠

莊昶撰十賢祠記

大梁書院者祠濂溪康節溫

公明道伊川橫渠晦菴東萊南軒魯齋十賢又集

天下書以資學者遊學之處也嗟乎書一也有吾

心之書有紙上之書吾心之書者吾心之神也吾

心之道也而紙上之書者不然不吾之心而吾之

心著之於言語也不吾心之道而吾心之道託之於文字也嗟乎聖人貴無言而不貴有言有言則不以心契不以心傳而言徒言矣如六經莫大於易而易言陰陽也方其無言也易具於心渾然而無破及其有言則孰為陰孰為陽而陰陽之授受皆得之紙上而易始散矣易非散也紙上而易者散也四書莫精於中庸中庸言性道教也方其無言也中庸具於心噩然而無名及其有言則孰為

性孰爲道孰爲教而性道教之授受皆得之於口耳而中庸始亂矣中庸非亂也口耳而中庸者亂也至於詩書禮樂春秋論孟無不皆然故善觀六經者不觀六經而觀吾心之六經善觀四書者不觀四書而觀吾心之四書吾心之書果何書哉不楮墨而文也不文字而見也不誦讀講說而明也秦火雖烈而不可以焚也漢儒雖陋而不可以鑿也不河圖不洛書而九疇八卦之象自形也不詩

不禮而溫柔敦厚之妙自著也品節防範之等自
嚴也不春秋而華袞鈇鉞之賞罰自當也溥之而
天地位也推之而萬物育也幽之而鬼神感也微
之而神化妙也充之爲聖爲賢爲堯舜爲孔孟爲
周程爲張朱也用之爲百姓安爲禮樂和爲人心
正爲異端息爲臣不敢以僭其君爲四裔不敢以
輕其中國也吾心之書至於如此此豈索之玄冥
索之象罔之所得哉此以心授而彼以心領也此

以心得而彼以心見也往年白沙陳先生過余定
山論學余以是質之先生不以余言爲謬世之好
事者詆陳學爲禪夫禪謂之無然無極而太極靜
無而動有者吾儒亦不能無也但吾之所謂無
者未嘗不有而不離於有禪之所謂無者未嘗有
有而實滯於無禪與吾相似而不同矣嗟夫天下
之人豈無真與僞哉天下之事豈無是與非哉惟
有以辨之耳然苟不知夫周行之大者惡知曲徑

之是非不知吾儒之真者安知他道之有偽遊學
於是者其亦以余言爲禪否哉將因紙上之書以
觀吾心之書而契夫周程張朱諸賢之道則書之
所集大矣是役也始於憲副劉公欽謨中於僉憲
吳公原明成於開封守張公九雲而唯諾上下則
都憲李公文盛趙公守約也既成方伯吳公行驗
憲使劉公尚珮暨諸僚佐謂不可無記於是九雲
謀之僉憲傳公商佐石公宗海以請於余余於諸

公爲先進與商佐九雲爲同年宗海爲同里爲同
學而又爲同年皆余友也余所敬慕而請益者也
敢書其所謬學者以復之亦未知其是與否也諸
公將亦教我乎哉

岳武穆祠

在朱僊鎮武穆舊班師地也居民追思其功
立祠祀之成化二十一年河南布政使吳節

開封知府張岫始
建議恢拓祠宇焉

許真君祠

舊在上清儲祥宮內真君晉人也爲旌陽令
夙著靈異之跡政和二年五月賜號曰神功

妙濟真君以所遺詩百二十首書諸竹簡戴之
甯中令人探取以決休咎名曰聖籤祠今廢

東岳張太尉祠

在城外東南隅熙寧間百姓共立相傳神姓張氏淮陰人死爲神隸東岳主幽

冥之事京東州郡往往有祠所謂張舍人者是也皆稱之曰太尉元豐中光獻太皇太后祈請有感始封

嘉應侯
今廢

庇民祠

舊在城東北數里南神岡以祀巡撫侍郎于公謙也謙宣德正統間以兵部侍郎巡撫河南有

經國裕民之績屬黃河水溢侵迫省城公虔誠致禱誓以身徇之投以所御公服河遂消縮居民恃公無恐公乃鑄鐵犀二以鎮河自撰銘于犀背云始公之巡撫河南也年纔三十有三律身介潔一毫不取諸民性嚴毅不能媚權貴人其入京議事獨不持土物賂當路汴人嘗誦其詩曰手帕磨菇與線香本資民用反爲殃清風兩袖朝天去免得閭閻語短長公坐薦參政孫原貞王來代已謫大理左少卿汴民詣闕

乞留乃復命巡撫前後垂二十年汴父老思公之德又於省城西南隅馬軍衙橋西復立一祠以便香火蓋即公巡撫時公廨舊址也汴人呼爲于少保祠

胡謐撰庇民祠記 庇民祠舊在河南開封府城

東北數里而近神岡側正統庚申歲黃河徙嚙大堤勢薄府城上下驚惶巡撫侍郎于公謙告天誓以身殉投以所御公服躬督築以捍其患遂弭且範鐵爲屏勒銘其背以鎮永遠豫民感公之惠以免墊溺爲建是祠以與土神河神並祀焉蓋閱四

紀于今矣而當時故老定興知縣致仕甄鐸輩百數十人合疏公曩撫中州厥績甚夥匪直弭河患而已請建專祠于府城西南隅公之寓廨故址有若公猶存蒞且便遠近奠謁於是藩臬聞諸僚咸是其請遂給材斲洎百需諏日鳩工經始于成化丁未春二月僅五閱月告成中爲屋六楹肖公像其內左右翼兩廂楹各如之前墜中門大門各四楹周繚崇墉扁仍舊曰庇民之祠從民意也藩臬

聞諸僚率甄鐸輩落之而告慰公神如禮歲以公
誕諱日用牲醴致祭著爲儀遠近過謁及有祈禱
者聽復祥符縣民二戶守之俾藝其旁隙地若干
畝以資香火費甄鐸輩仍具前疏謁余請書其事
于麗牲之石按公浙之錢塘人繇進士拜監察御
史擢兵部侍郎宣德壬戌以簡命膺茲巡撫重寄
始下車會官取銀礦將議立課公較得不償費禁
採給民孳牧僅用土有芻水十數州縣殺山東北

畿什六七境內水可渠可堰者諭民鑿築以資灌
溉民多獲利遇歲歉則請寬積逋罷冗征醵地民
苦輸額稅則請折布以紓之存聚倉儲及勸分在
在充盈時艱食則平直以糴獲濟甚博教民樹藝
田宅桑棗道路榆柳皆蔚然成效興學育才尤加
之意其於屬僚務先身率賢者榜其治績以示勸
否則按黜不少貸嘗以薦人代已任坐調大理少
卿召還朝時豫民千餘人詣闕乞留詔許之尋復

原官而所薦之人後皆名位與並人尤服其明於
知人云未幾以憂去民復乞留詔公起復蓋公撫
蒞中州前後凡十有八稔厥績歷歷可紀而弭河
患尤足以見其感動天地此豫民今昔所爲以建
庇民之祠也嗟乎有官在治而人稱頌之崇奉之
固其有以得民然非阿則暱未必皆誠也惟夫既
去而猶思既沒而益慕不忘者然後見其得民之
心之誠且篤耳于公之撫蒞中州也兩去而民兩

乞留且爲建生祠以並祀土河之神冀與相爲悠
久比既沒數十稔而民慕之如一日又請建專祠
以事公若生存焉非其得民之心之誠且篤疇克
爾哉甘棠之詠清風之碑殆與是祠異世而同符
矣乎抑公昔無巡撫山西績視河南並偉而自去
此還朝擢本部尚書至少保其安內攘外有功于
社稷尤大以不繫河南不著雖然朝廷議功方將
秩公命祀以配享郊廟獨庇民之祠而已哉

胡謚撰祭少保于公文 惟公昔以亞卿巡撫河
南適值黃河徙溢衝突汴城公爲築堤捍禦俾免
墊危且範金爲犀勒銘其背以固永遠既而公被
召入朝而汴氓感公之惠思公之德相率建祠堤
旁肖公遺像其內以與土神並祀有年蓋冀公之
功與茲土相爲無窮焉耳顧有司漫不省所有事
誠缺典也仰惟公自去此入擢上卿進位師保以
佐聖天子安內而攘外其澤加四海名震四夷既

沒而褒卹之典光徹幽壤固非一汴氓之祠爲足以崇報我公也然自古名臣碩輔秩諸命祀以配享郊廟者未有不因其播歌頌于閭閻田野之間而致然也若今汴氓祀公治水之一績殆將以基國家秩公命祀于百世矣乎嗚呼公形雖邈澤則永存黃河之水其流源源某等承乏於斯適因河患薦臻方規遵公餘軌續公遺緒仰止高山其思曷已爰謁祠下踞薦一尊矢詞以誅公其有聞伏

惟尚饗

廟

三皇廟

在城內東北隅良岳廢址之上元人吳炳有記見藝文

禹廟

在城東南三里許吹臺上舊名二姑臺宋都人建廟以祀二僊姑弘治中改爲碧霞元君祠好鬼者

翕然趨之觀風者毀其像改祀神禹稱禹廟焉又增建兩廡祀中古以來治水有功者爲河患也余弱冠時讀書臺上猶見兩廡木主比謝政歸里偶一登覽而木主無一存者因識于此以俟宦遊君子興復之庶弗沒前人崇祀之意云

兩廡分祀歷代治水有功者共二十九人

魏鄴令史起

秦水工鄭國

漢淮陽太守汲黯

大司農鄭當時

水工徐伯表

河堤使者王延世

待詔賈讓

樂浪王景

將作謁者王吳

宋潁川團練使曹翰

京西轉運使陳堯佐

判都水監張鞏

戶部副使張燾

太師溫國謚文正司馬光

內侍省副都知張茂則

龍圖閣待制河北都轉運使張商英

元河南河北肅政廉訪使尚文

尚書諾海

御史劉賡

太師恒陽王謚文貞額森布哈

河南河北道僉事阿魯托琳

榮祿大夫集賢大學士賈魯

太史郭守敬

丞相托克托

國朝工部尚書安然

少保太子太傅兵部尚書謚肅愍于謙

戶部尚書謚恭定年富

都察院右都御史王暹

河南右布政使王亮

玄帝廟

有三處一在城西南隅即佑聖觀今改爲大道宮祀北方玄武之神一在安遠門之甕城內一

在水魚寺之廟兒岡漁有記見藝文

樊將軍廟

在仁和門外祀漢樊噲今廢

漢壽亭侯廟

有數處一在安遠門迤南街東廣福坊俗呼爲大關王廟一在大梁驛北隣俗呼爲

小關王廟一在大梁門城下一在西關金梁橋東今汴城五門皆有關王廟惟安遠門則立帝廟以北方

之神故也

城隍廟

在城內新昌坊元河南路都總管劉福建王秋澗有記見藝文國朝洪武二年誥封爲承天鑒

國司民顯聖王明年詔天下諸城隍俱革前代封爵各從本府州縣之名而開封府城隍誥命見存洪熙元年道士范景新重修天順五年淪于水道士蕭守正葺完

旗纛廟

在都司公署之後祀昭烈武成王而下歷代諸名將宣武衛以附都司不置

二相廟

舊在城內祀子游子夏今失其處

皮場公廟

在城內東北隅相傳皮場土地主瘍疾之不治者或曰皮場公即鄭大夫子皮也代父子

展爲上卿執國政鄭饑而未及麥民病子皮以父之命餽國人粟戶一鍾鄭人德之立廟以祀之而汴城距鄭不遠故亦廟祀焉二說未知孰是

宋朝燕翼詒謀錄

京師試於禮部者皆禱於二

相廟二相者子游子夏也子游爲武城宰子夏聘

列國不知何以得相之名也今行都試禮部者皆

禱於皮場廟皮場即皮剝所也相傳皮場土地治

瘍疾之不治者徽宗建中靖國元年詔封爲靈貺

侯其後累封明靈昭惠王今廟在萬壽觀之晨華
館館與貢院爲隣不知士人之禱始於何時館因
何而置廟也

梓潼廟

在蔡河灣即宋太學中之桂香祠太學徙而祠
存乃稱梓潼廟云舊祀文昌司祿宏仁帝君左

右桂祿二籍僊官凡
應試士子祈禱有應

東嶽廟

在城內東隅祀泰山之神祥符元年十月詔封
爲東嶽天齊仁聖王四年五月尊稱帝號國朝

釐正祀典稱東
嶽泰山之神焉

二郎廟

在城南之奉神岡即灌口二郎神也正統十三
年戊辰四月汴旱祈雨有感祥符知縣米榮縣

丞朱璟重修殿宇煥然一新開封府儒學教授三衢吾用溥撰碣記今尚存

火神廟

在城內鼓樓東祀祝融之神也初宋徽宗建火星觀于太乙宮側右正言任伯雨有疏止之茲

廟不知立于何時無所考

德安公廟

在城北作坊即夷門山神也景德四年十二月加封德安公詔葺其廟命開封府春秋致

祭今廢

崔府君廟

在城北相傳唐滏陽令死爲神主幽冥事廟在磁州淳化初民於此置廟後詔修殿宇賜

名護國廟及送衣服供具景德元年重修每歲春秋命開封府致祭後封護國顯應公云今廢

石靈公廟

在相國寺橋之西汴河南岸相傳汴京之南有周令公墓墓前二石人頗著恠異之蹟人

或遇之乃稱魯校書石押衙都人
因立廟以祀之故稱之曰石靈公

金龍四大王廟

在祥符縣治之南汴河北岸州橋之側祀河神也今爲居民侵占狹小矣

普濟廟

在城西南隅景福坊即九龍堂也大中祥符四年夏六月詔令完葺因賜今名今廢

三官廟

城內外有數處其最著者在西關外二里許宣德間建正統辛巳圯于水殿宇廟貌皆壞成化

壬辰布政司照磨熊剛管修別工有餘材松木百餘根助葺是廟而開封府知府河東張岫爲之記碑刻

立于殿前見存

宋濂論三官

按漢熹平間漢中有張脩爲太平

道張角張魯爲五斗米道其法畧同而魯爲尤盛

蓋自其祖陵父衡造符書於蜀之鴈鳴山制鬼卒
祭酒等號分領簿衆有疾者令其自首書氏名及
服罪之意作三通其一上之天著山上其一埋之
地其一沈之水謂之天地水三官而三官之名實
昉於此夫至高者天至厚者地水縱大亦兩間一
物耳何得與天地抗哉今並稱之爲三吾未知其
何說也

玉皇廟

在南薰門外上城內官路之西相傳爲玉清昭
應宮遺址也天聖七年夏六月丁未宮燬于火

僅存長生崇壽二殿詔不復修改爲萬壽觀乃以崇壽殿更名太霄殿奉玉皇銅像後燬于金兵成化丁亥道士董道靜募緣興建玉皇廟于此地又移五岳觀中五岳四瀆像于中殿蓋五岳觀在教場之西密通此地洪武己酉爲雷火所燬止存諸像道士董道靜因移寘于是廟中今見存

庵

觀音庵

在城內大寧坊木場街之南國朝洪武三十年尼僧人栢等創建

圓通庵

在仁和門裏宣平坊國朝洪武二十一年尼僧勝海等創建汴人呼爲老君庵

曹僊姑庵

舊名寶籙堂在金梁橋之西南宋徽宗建以爲曹僊姑所棲之處後姑化去遂爲女冠所

居國朝洪武三十二年黃河入城湮沒圯壞有祠堂記碑乃移置延慶觀內今見存

以上三庵皆尼庵也今俱廢

鄭昂撰希元觀妙先生祠堂記 先生姓曹氏諱

道冲字冲之全趙寧晉人贈中書令尚書令保貴
之來孫襄悼魏國公利用之族孫也父宗詰故承
務郎欽州靈山縣主簿母石氏五代晉之後初魏
國公章聖時和我有大勲賜都城普惠坊第因以
居汴奕世忠義冠劍蟬聯同爨者十餘世詔旌其
門先生自扶坐能言便解文字五歲賦詩屬文十

五歲古今載籍所記博極無遺一經目終身不忘
家人患其弄翰墨即登屋賦詠書遍萬瓦諸教洞
徹咸得其要妙嘗謂處世居家均在樊籠不願嫁
適脫身邈去二十一歲隱於少室山玉華峯棲神
導氣者凡十餘年惟恐一物累己衣糧不齎人自
供給若有神助時二親在堂弟妹滿前弗恤也家
人蹤跡之則宛轉潛避齊人張公諫議知其異度
爲女冠因遙指青州遠遊觀張幾真爲師欲受錄

無資乃足歷四方貨文于市以寓乎所謂道者既
而受錄于閭皂山於是四方始知先生之名矣然
天資蕭散放曠物外不就繩檢故毀譽幾半天下
而先生終無喜愠時或諧謔形于詞章微著其意
而已晚入京師大隱于閭闔門之咸寧坊衣足蔽
體食僅充腹廕容膝之地混然與猫犬同迹其鼠
壤餘蔬不可嚮邇意欲杜絕勢利焉至貧困者有
所告則丐以詩使貨鬻度日都人供饋者肩踵相

摩多所不納有不能却尋以施予不如葷血但日
市以食猫犬或問其故曰無他救其欲殺者而已
或謗其肉食者即取以對食曰於道何害但不欲
耳謗者慙焉歲時都人遊賞則放傲先至諷詠以
歸或嘉節良辰反杜門不出皆所不可曉也上方
以道在宥天下異人並出始以徐神翁言得先生
於輦轂之下召對無時仍給金牌二聽赴行在與
諸池苑無得禁止其延見異數莫與倫比上嘗曰

此真僊也文華乃其餘事詔加清虛文逸大師先生初名希蘊至是始賜今名又加道真仁靖先生復爲起第乃瀝懇牢辭不得已僅受數楹爲樓以奉三清晨夕焚脩用祝君壽詔復名其室爲寶籙堂又爲營保慶泰寧宮於其側將落成而先生尸解矣上爲之惻然葬於國郊開封縣新里鄉使觀察賈公護其事仍給御府錢齋七作黃籙醮以爲資薦贈號希元觀妙先生以誥付其第詔復建宮

于順天門瑤華宮中之左方便弟子張居淡以奉
其祠居淡清脩人也慕道甚堅早辭家師事先生
凡二十年始終如一逮先生之化見其疇昔與先
生厚者則泣涕沾襟惟恐師後事之不周因請起
祠堂于今宮昊天玉皇上帝清都高邈殿之後質
不至陋華不至侈戶牖取具務欲垂久居淡謂先
生初闕銘誌爲終身恨僕告以古今名師大士道
行天下名流後世詎可泯邪區區銘勒端無重輕

了不以僕言爲然復泣以告僕久與先生遊且實
里人義不得辭因爲叙其畧先生名播四海久矣
初還都邑寓籍于延寧宮而身未嘗往及保慶泰
寧宮成遷延不入終以化去則僕前所謂先生自
言以處世居家均在樊籠者意謂是也誥命謂凝
情冲和混迹民伍蓋盡之矣自遭際未嘗以纖毫
私輒冒上聽故恩眷益隆若叙其平生所爲則歌
辭備矣知者得之無復覩縷至若聲律書畫歷數

方技他人盡智力而能之者先生皆優爲之其尤
長者文詞也初若不經思慮人方見其含毫伏紙
轉眸之間掀雷抉電而珠玉已粲然矣人所需索
無不如意於闌闌宴席岑寂幽隱之地咸無所擇
以一物爲題有至百篇者其警策語尤出人意表
依隨聲韻立筆賡和愈見其工案無文籍所用事
實備無遺謬上至三墳五典八索九丘諸子百家
之書下至里巷俳諧方言時謠無不窮貫彼世人

徒見先生嘲謔之語而不識先生典麗之文徒見
先生典麗之文而不知先生要妙之道吁可恠也
如老莊與黃庭西昇清淨經注解性命之說則得
之者幾希蓋其平生所爲文意之所至目之所覩
凡天地範圍之間無不模寫而世或能道之至于
微妙希夷之語脩身盡性之說其和者蓋寡焉矧
其起居動靜之間筆端風生著述萬數浩浩如江
河沛然莫之能禦頃有詔盡索其篋中所有閣於

玉清和陽宮轉輪之藏室既化之日益令收掇其
殘橐自是落人間者無幾矣噫先生之遇聖主可
謂時矣餘何恤哉嘗謂士子於道未得秋毫之一
涸思乾慮於章句之末幸有司一得以取終身之
富貴自謂天下莫已若安知先生之所謂浩浩如
江河沛然莫之能禦者邪或問先生之道僕嘗見
其蓬頭垢面衣結履穿而聲韻清暢眸子瑩徹夷
然自得宛若童稚且盡天下無窮之能事而甘舉

世不堪之寂寞先生處世之迹概可知矣若先生之道僕又安足以知之姑叙其文詞之能而已矣夫聰明辯知固足以害道而道之至則非聰明辯知之所能害也今有人未嘗與文墨親一有所悟則吐言爲辭咸契至理何則道本無爲而無所不通聰明辯知者乃道之用而已逮其源流深遠詞藻華麗則又非一世之習也考諸古今能文之士白首而窮一經十年而工一賦者比比也其至

倚馬七步之敏固已無幾雖然此特窮篇短翰爾
若先生之落筆萬言聲律無誤小大不拘真解鮮
儷也抑聞之昔人以太白爲謫僊則文詞之豪非
神僊似不能爲白玉樓成必待長吉之文則神僊
之於文亦云難矣僕是以樂爲之書先生享年七
十有七生于寶元三年二月二十七日化于政和
五年七月二十一日塋以其年十月十五日其化
也道院產玉芝一本五莖既塋之日天氣晴霽其

祖塋魏國公碑泉潤交下如淚落狀衆謂天寒露
潤徐視他塋皆所無有始大驚嘆嗚呼先生間氣
所鍾其異事難以毛舉云政和丁酉冬十月十有
七日

右曹僊姑祠堂記乃宋朝散郎試秘書少監兼
編脩六典鄭昂筆也中有語涉恠誕者余悉刪
之不欲存之以惑世云爾

院

戒壇院

在雷家橋西北舊慈孝寺園宋仁宗寶元二年初建元末兵燬

佑聖院

在鰲劉二隅街之西北元末兵燬

寶聖院

在蔡河北寺橋之南宋時僧錄重珣初建仁宗景祐元年賜額元末兵燬

等覺院

在安遠門外之西北宋太祖乾德六年初建金季兵燬

兜率院

舊名旌孝院在安遠門外之西北宋仁宗天聖元年改名兜率金季兵燬

萬歲院

在仁和門外之東北周世宗顯德二年初建金季兵燬

福田院

在仁和門外之東北唐太宗貞觀二年初建後爲兵燬

三學護國院

在南薰門外之西南宋仁宗慶歷三年賜額元末兵燬

報恩院

在戴樓門裏宋真宗咸平三年初建元末兵燬

鴻禧院

在戴樓門裏之東北宋太宗端拱二年初建元末兵燬

法雲院

在固子門裏金水河灣之西南宋真宗大中祥符三年初建金季兵燬

開化院

在固子門裏金水河之南白鶻橋之東宋大中祥符三年初建金季兵燬

黃建院

在土市子街東南棺子巷之西元末兵燬

淨居院

在大梁門外西北寶相寺之北元末兵燬

淨慧院

在大梁門外西北南唐主李煜歸宋賜第于此煜卒後爲寺元末兵燬

開聖院

在裏城之西南隅宋仁宗天聖間初建元末兵燬

道者院

在鄭門外五里宋時所建每歲中元節十月朔設大會道場焚錢山祭軍陣亡歿孤魂金李兵

燬

高文虎蓼花洲閒錄 五代時有僧某菴道邊

藝蔬丐錢一日晝寢夢一金色龍食所藝蒿苳數

畦僧寤驚曰必有異人至已而見一偉丈夫於所

夢之處取蒿苳食之僧視其狀貌凜然遂攝衣延

坐餽食甚勤頃刻告去僧囑之曰富貴無相忘因

以所夢告之且曰公宅日得志願爲老僧只於此

建一寺足矣偉丈夫乃藝祖也既即位求其僧尚
存遂命建寺賜名普安都人稱爲道者院

啓聖院

在大梁門內街北即太宗誕生之地晉護聖營也太平興國六年建院雍熙二年成賜名啓聖

元末
兵燬

宋敏求東京記 啓聖院本晉護聖營天福四年
宣祖典禁兵太宗誕聖其地興國中建院

葉少蘊石林燕語 啓聖禪院太宗降誕之地太
平興國中既建爲寺以奉太宗神御太祖降誕于

西京山子營久失其處真宗朝嘗遣人訪之或以
驍勝營旁馬廐隙地有二岡隱起爲是即其地建
應天禪院以奉太祖天聖中明肅欲置真宗神御
其間而難于言太宗因以殿後齋宮並置二殿曰
三聖殿慶厯中始名太祖殿曰興光太宗曰帝華
真宗曰昭考

定力院

在蔡河東水門
之北元末兵燬

廖瑩中江行雜錄 太祖之自陳橋還也太夫人

杜氏方設齋於定力院聞變王夫人懼杜太夫人
曰吾兒平生奇異人皆言當極貴何憂也言笑自
若是日太祖即位契丹北漢兵皆退

趙葵行營雜錄 太祖初受周幼主命北討至陳

橋爲三軍推戴時太后以下眷屬悉在定力院設
齋有司來搜捕主僧令登閣而固其扃鑰俄大搜
索僧紹云皆散走不知所之矣甲士入寺升梯且
發鑰見蛛網布滿其上塵埃凝積若累年不曾開

者乃相告曰是安得有人遂皆去有頃太祖已踐
昨矣

觀音院

在麗景門裏街
北元末兵燬

四聖院

在麗景門南
金季兵燬

淨因院

在金梁橋西汴河
之南元末兵燬

蘇軾撰宸奎閣記略

皇祐中有詔廬山僧懷璉

住京師十方淨因禪院召對化成殿問佛法大意

奏對稱旨賜號大覺禪師仁宗與璉答問親書頌

詩以賜之凡十有七篇至和中上書乞歸老山中
不許治平中再乞堅甚英宗留之不可賜詔許自
便璉遂歸老于四明之阿育王山廣利寺四明之
人相與出力建大閣藏所賜頌詩榜之曰宸奎時
京師始建寶文閣詔取其副本藏焉璉持律嚴甚
上嘗賜以龍腦鉢孟璉對使者焚之曰吾法以壞
色衣以瓦鐵食此鉢非法使者歸奏上嘉歎久之

興德院

在金水門外
金季兵燬

楊萬里揮麈錄 英宗以齊州防禦使入繼大統

治平二年改齊州爲興德軍熙寧八年八月詔潛邸爲佛寺以本鎮封之賜名興德禪院仍給淤田

三千頃

印經院

太平興國八年置印經院神宗熙寧末廢其院以諸經印板賜顯聖寺

傳法院

太平興國五年詔於太平興國寺大殿西度地作譯經院中設譯經堂東序爲潤文堂西序爲

正義堂自是每誕節即獻經也八年改爲傳法院按隋有翻經館唐初亦有翻譯之事元和後廢太宗之

置茲院亦隋翻經館之遺意也

僧惠洪冷齋夜話 景祐中光梵大師惟淨住京
師傳法院以梵學著聞景靈宮鋸匠解木木既分
有蟲蠹紋數十字如梵書狀因奏進上遣都知羅
宗譯潤經文夏英公竦詣傳法院導譯冀得祥異
之語以識國淨焚香審視逾刻乃曰天竺無此字
不能辨譯右璫恚曰大師宜領上意若稍成文譯
館恩例不少而英公亦以此意諷之淨曰幸若蠹
紋稍可箋譯誠教門光也異日彰謬妄萬死何補

富鄭公每語客曰此人誠可謂佛弟子也使其立朝必能盡節不苟同於人孰謂異教中無人邪

以上皆僧院也今俱廢無一存者

廣慧院

舊名黃姑庵在土市子南街東宣平坊金熙宗皇統初尼僧妙勝初建後燬于火國朝洪武五

年尼僧廣元復脩

興國院

在大寧坊第五巷即宋將鄭恩之佛堂施舍爲尼寺國朝永樂元年尼僧義和重脩

崇真院

初太宗陳國長公主出家大中祥符二年八月進封吳國號報慈正覺大師賜名清裕九月出

居是院初在建初坊後以迫隘徙城西隆安坊即今俗稱七公主院是也

以上皆尼院也今俱廢無一存者

大梁書院

汴舊有麗澤書院在南薰門內蔡河北岸提學副使劉昌建也後因改作巡撫治所乃徙

書院于城之東南三里許繁臺之上更名曰大梁書院尊創未成化間提學僉事吳伯通請于巡撫都

御史李衍檄開封府知府虞鍾督工繕造明年知府張岫脩完

按大梁書院乃近時創建者非宋之遺蹟也以
造士之所不可遺姑附于此

汴京遺蹟志卷十一

欽定四庫全書

史部

汴京遺蹟志卷十二

詳校官左都御史_臣李綬

編修_臣程嘉謨覆勘

覆校官主事_臣龔敬身

校對官中書_臣李 葵

校對官原任中書_臣徐步雲

謄錄監生_臣陳元熙

謄錄監生_臣官懋弼

欽定四庫全書

汴京遺蹟志卷十二

明 李 漁 撰

雜志一

汴宋九帝紀年

宋太祖姓趙氏諱匡胤其先涿郡人庚申以殿前都點檢受周禪時年三十三因五代之舊都汴在位十七年丙子崩壽五十

改元三

建隆三
開寶九

乾德五

太宗諱炁初名匡義太祖之弟賜名光義封晉王丙子
嗣立時年三十七在位二十二年丁酉崩壽五十九

改元五

太平興國八
淳化五

雍熙四
至道三

端拱二

真宗諱恒初名元侃太宗第三子丁酉嗣立時年二十
九在位二十六年壬戌崩壽五十五

改元五

咸平六
天禧五

景德四
乾興一

大中祥符九

仁宗諱禎初名受益真宗太子壬戌嗣立時年十二在
位四十一年癸卯崩壽五十四

改元九

天聖九
寶元二

明道二
康定一

景祐四
慶厯八

皇祐五

至和二

嘉祐八

英宗諱曙初名宗實濮安懿王子詔立爲皇子癸卯嗣立時年三十三在位四年丁未崩壽三十八

改元一

治平四

神宗諱頊英宗太子丁未嗣立時年十九在位十八年乙丑崩壽三十八

改元二

熙寧十
元豐八

哲宗諱煦初名傭神宗太子乙丑嗣立時年十歲在位十五年庚辰崩壽二十五

改元三

元祐八
元符三

紹聖四

徽宗諱佖神宗第十一子封端王庚辰嗣立時年十九在位二十五年乙巳禪位于太子丁未金人陷中原北狩後九年乙卯崩于五國城壽五十四

改元六

建中靖國一
政和一

崇寧五
重和一

大觀四
宣和七

欽宗諱桓徽宗太子乙巳受禪嗣位時年二十五丁未

金人陷中原北狩後三十四年庚辰崩壽六十一

改元一

靖康一

一統志 宋太祖永昌陵太宗永熙陵真宗永定陵仁宗永昭陵英宗永厚陵神宗永裕陵哲宗永泰陵皆在河南府鞏縣西南

周密癸辛雜識 徽宗欽宗初葬五國城後數遣祈請使欲歸梓宮凡六七年而後許以梓宮送行在高宗親至臨平奉迎易總服寓于龍德別宮一

時朝野以爲一大事諸公論功受賞者幾人費于
官帑者大不貲先是選人楊煒貽書執政以爲真
僞未辨左宣義郎王之道亦上奏乞命大臣斷而
視之既而禮官請用安陵故事梓宮入境即承之
以槨仍納袞冕輦衣於槨中不改斂遂從之近者
楊髡盜發諸陵於二陵梓宮內畧無所有其一止
有朽木一段其一則木燈檠一事耳當時已逆料
其真僞不可知不欲逆詐亦聊以慰一時之人心

耳蓋二帝遺骸飄流沙漠初未嘗還也哀哉

王鏊讀宋史 宋自建隆至慶厯人主以恭恕爲

心宰輔以寬厚稱上意天下稱治至神宗狹小宋
家制度欲大有爲而王安石相之凡祖宗之制一
切掃去天下騷然遂基一代之亂元祐初召用司
馬光凡新法之不便民者一切掃去紹聖間章蔡
得志復取元祐之政一切掃去追奪司馬光等官
蔡京繼之而元祐元符諸賢竄徙殆盡又倡爲豐

亨豫大之說以侈靡蠱惑君心遂致中原淪陷左
衽而二帝蒙塵矣悲夫

宋官制沿革

按宋官制沿革各家紀載互有異同惟黃琦元禮論宋
之新舊官制頗爲詳密其畧曰國朝自太祖設官分職
多襲五代之制雖稍有增損大體仍舊唐制省部寺監
之官無所職掌別領內外任使省部寺監別設主判官
員額惟以侍中中書令同中書門下平章事爲宰相乾

德二年始置參政爲宰相副貳初以薛居正呂餘慶爲之宰相所居省謂之中書門下國政所出兵政隸樞密院承五代之制有使副使太宗朝命石熙載以樞密直學士簽書樞密院事後以張士遜爲知樞密院事寇準溫仲舒同知樞密院事治平中郭達以檢校太保同簽書樞密院事故樞密有使副使知院同知院簽書院員額與中書號爲二府尚書置判尚書都省一員掌百官赴省集議及大祀受禋戒之事六部各有主判率以學

士待制館閣官領之吏部即審官東院掌尚書左選審官
西院掌尚書右選吏部南曹掌侍郎左選三班院掌侍
郎右選流內銓考功郎官之職也戶部郎三司使尚書
之任也其官崇職重久次者爲使稍輕則爲權使資淺
則爲權發遣使公事度支副使戶部副使鹽鐵副使各
一員此侍郎之任也別置司判官八員度支判官戶
部判官鹽鐵判官各一員所掌本曹郎官之職也判會
案一員掌造器械唐軍器監職也判脩造案一員唐

工部將作少府監職也判磨勘司一員掌勾考唐比部

職也判

開

院一員掌審司出納及審覆百官諸司兵級

請俸舊兼禁軍以繁冗別立諸司專計司掌之以分其
職判理欠司一員掌催促諸路遺欠禮部有判部及判
禮部貢院即尚書侍郎之任內兵部事歸樞府工部事
歸三司故此二部不設主判官多以別官兼之刑部則
判審刑院及詳議官掌詳覆諸路奏案是其職也翰林
學士襲唐制以六員爲額其帶知制誥即釐本院職事

其別領省府職任即不帶知制誥內年德俱重者一員
爲承旨知通進銀臺司兼門下封駁事其任即給事中
也而隸樞密院知制誥即中書舍人之職也御史臺雖
有大夫員而不除以中丞爲臺長次侍御史知雜事侍
御史裏行殿中侍御史殿中侍御史裏行監察御史監
察御史裏行已上爲諫官以別官兼領官即爲知諫院
同知諫院亦有正諫議大夫司諫正言者九寺則判太
常寺禮院即卿之任也資輕者爲知院同知院兼掌博

士之職宗正有判寺一員太僕職屬群牧司有制置使一員以樞府及學士領之有判官一員大理則糾察在京刑獄是其職也鴻臚歸客省四方館光祿司農太府其職皆隸三司衛尉無所總轄其職分爲金吾衛仗司其環衛之任分隸三衙皇城司故此五寺別無置司并主判官員秘書省即昭文館史館集賢院謂之三館與秘閣同隸本省有直館直院直閣校理館閣校勘謂之館職初除於本省供職一年出補內外任使昭文史館

有直館集賢院有學士脩撰直院校理秘閣有直閣校理又有判秘書省秘閣一員專掌省事國子監有判其資淺者爲同知或同管即祭酒司業之任博士轉而爲直講將作少府軍器三監之職並屬三司而都水無常員遇興役即差官亦係三司差人迨熙寧興役法水利方置判司農寺并司農寺丞員闕建大理寺方置權發遣大理少卿公事二員職掌官外有學士待制等員惟觀文殿大學士仁宗朝以賈昌朝辭使相特建此職仍

詔非曾任宰相不除觀文殿學士資政殿大學士資政
殿學士端明殿學士翰林侍讀侍講學士龍圖天章寶
文閣學士直學士樞密直學士三閣待制皆爲侍從清
望之選並無職掌多帶職以領在內省府寺監在外藩
方任使自資政以上多以授二府舊臣此國朝舊制如
此元豐初始命置局詳定官制在內設尚書省置令左
右僕射門下省置侍中中書省置令已上爲宰相而兩
令侍中不除人尚書有左右丞門下中書各有侍郎樞

密院有知樞密院事同知樞密院事已上爲執政官尚書六部吏部一尚書二侍郎分掌四選吏部司封司勳考功屬焉戶部一尚書二侍郎分左右曹而戶部度支金部倉部屬焉禮部一尚書一侍郎禮部祠部主客膳部屬焉兵部一尚書一侍郎兵部職方駕部庫部屬焉刑部一尚書一侍郎刑部都官比部司門屬焉工部一尚書一侍郎工部屯田虞部水部屬焉每部郎官二員知州已上資序及階官朝議大夫已上爲郎官餘員外

惟吏部戶部刑部郎官各置四員以其劇曹也左右司郎官各二員通糾六部號都司專佐宰相理省事謂之宰屬翰林學士定以二員爲額久次者爲承直御史臺官名如舊制而除知雜事及裏行之名門下後省置左散騎常侍而不除人給事中四員起居郎一員左諫議大夫左司諫左正言寓焉中書後省置右散騎常侍而不除人中書舍人六員起居舍人一員右諫議大夫右司諫右正言寓焉號兩省官秘書省有監少監丞郎校

書郎正字著作郎佐郎寓焉號館職罷直館院校理等
員闕惟存脩撰直秘閣號貼職而別領在外任使九寺
太常宗正光祿衛尉太僕大理鴻臚司農太府有卿少
卿丞簿太常復置博士太祝奉禮協律郎大理則置寺
正評事司直四監將作少府軍器置監少監丞簿南外
北外丞已上爲寺監官國子監有祭酒司業丞簿太學
有博士正錄已上爲學官謂職事官罷三司使副及諸
主判官而其職分隸諸省部寺監群牧司使名不除而

不命官其職皆屬太僕寺以太師太傅太保爲三師太尉司徒司空爲三公皆論道之官無專領之職爲宰相兼官以開府儀同三司易節度使同中書門下平章事號爲使相以唐文散階換省部寺監官歸釐本職號階官爲寄祿官而食其俸以領內外任使以特進易左右僕射金紫光祿大夫易吏部尚書銀青光祿大夫易五曹尚書光祿大夫易左右丞正議大夫易列曹侍郎通議大夫易給舍太中大夫易左右諫議大夫中大夫易

秘書監殿中監中散大夫易大卿監朝議大夫易少卿
監朝請朝散朝奉大夫易郎中朝請朝散朝奉郎易員
外郎承議郎易太常國子博士奉議郎易太常秘書監
中丞通直郎易太子中允中舍左右贊善大夫宣德郎
易寺丞宣義郎易監丞承事郎易大理評事承奉郎易
太常寺太祝奉禮郎承務郎易寺監主簿自承務郎至
特進爲寄祿官大學士至待制其名皆存以爲二府罷
政省部長貳給舍諫議補外之職集賢殿脩撰直龍圖

閣直秘閣號貼職庶僚領在外繁劇任使者帶之削去
憲銜檢校官留勲十二轉自通直郎以上帶入銜此爲
元豐新制官名即循唐舊典職掌亦倣周禮六官之法
也

黃履翁論宋官制 本朝官制有二曰國初舊制

曰元豐新制舊制之善者則官職分治脉絡相統
祿秩有階遷轉得序也新制之善者則省部諸司
各有職掌郎曹等官不寄虛名也蓋國初懲藩鎮

之弊朝官文臣多領外寄九寺三監皆爲空官特以是寄祿秩班序位而已向所典之事則別有職存也至元豐八年取唐六典與廷臣博議踰二年而法成本末次第歷歷條舉或正而治之或旁而治之或統而治之向者省部寺監之無職今其職舉矣向者郎曹卿監之虛官今其官定矣此元豐新制不爲不善也

王鰲震澤長語 宋初承五代三省無專職臺省

寺監無定員類以它官主判三省長官不預朝政
六曹不釐本務給舍不領本職諫議無言責起居
不注記司諫正言非特旨供職亦不任諫諍以登
臺閣禁從爲顯宦不以官之遲速爲榮滯以差遣
要劇爲貴途不以勲階爵邑爲輕重名之不正未
有如宋之甚者也至元豐間始以唐六典而定官
制

又曰宋時兩制皆文學名天下者始應其選雖一

甲三人亦出知外任然後召試欲其知民事也其餘應試率皆一時有盛名者所謂制科是也故文學之士不至遺棄又通知民間利病以其曾試於外也我朝翰林侍從亦兩制之類率用高科一甲三人終不外任庶吉士每科或選或不選立法之意本欲使之種學績文以爲異日公卿之儲士既預此選自可坐致清要不復苦心於學又不通知民事天下以文學名者不復得預遺才頗多故不

若制科之爲得也

宋登科記總目

太祖建隆元年進士十九人榜首楊礪

二年進士十一人榜首張去華

三年進士十五人榜首馬適

四年進士八人榜首蘇德祥

乾德二年進士八人榜首李景陽制科一人

三年進士一人榜首劉察

四年進士六人榜首李肅制科二人

五年進士十人榜首劉蒙叟

六年進士十一人榜首柴成務

開寶二年進士七人榜首安德裕

三年進士八人榜首張拱賜十五舉未及第
人司馬浦等一百六人本科出身

四年進士十人榜首劉寅

五年進士十一人榜首安守亮

六年進士十一人榜首宋準再試取十六人
落一人諸科九十六人

七年停貢舉

八年進士三十一人省元王式狀元王嗣宗
諸科二十四人

九年停貢舉

太宗太平興國二年進士一百九人省元闕狀元呂

蒙正諸科二百七人十五舉以上一百八

十四人凡五百餘人

三年進士七十四人省元

闕

狀元胡旦諸

科八十二人

四年停貢舉

五年進士一百二十一人省元

闕

狀元蘇

易簡諸科五百三十四人

六年七年停貢舉

八年進士二百三十九人省元王禹偁狀元

王世則諸科二百八十五人

雍熙元年停貢舉

二年進士二百五十八人省元陳充狀元梁
灝諸科六百九十九人

三年四年停貢舉

端拱元年進士二十八人諸科一百一人覆試得
進士諸科七百人又武成王廟重試得進
士三十一人諸科八十九人省元程宿是

年不臨軒

二年進士一百八十六人諸科四百七十八人省元陳堯叟狀元同

淳化元年二年停貢舉

三年進士三百五十三人諸科七百七十四人省元孫何狀元同

四年五年至道二年三年並停貢舉

真宗咸平元年進士五十人諸科一百五十人省元孫

僅狀元同

二年進士七十一人諸科一百八十人省元
孫暨狀元同

三年進士四百九人諸科一千一百二十九
人省元李庶幾狀元陳堯咨

四年停貢舉制科七人

五年進士三十八人諸科一百八十二人省
元王曾狀元同

六年停貢舉

景德元年停貢舉

二年進士二百四十七人諸科五百七十人

省元劉滋狀元李迪

三年停貢舉制科二人

四年停貢舉制科二人

大中祥符元年進士二百七人諸科三百二十人

省元鄭向狀元姚晔

二年親試東封路進士三十一人狀元梁固
三年停貢舉

四年親試汾陰路進士三十一人狀元張師
德

五年進士一百二十六人諸科三百七十七
人省元闕狀元孫奭

六年停貢舉

七年亳州南京路進士二十一人狀元張觀

八年進士二百八十人諸科六十三人省元

高鍊狀元蔡齊

九年停貢舉

天禧元年二年停貢舉

三年進士一百四十人諸科一百五十四人

省元程戡狀元王整

四年五年乾興元年並停貢舉

仁宗天聖元年停貢舉

二年進士二百人諸科三百五十四人省元

吳感狀元宋郊

三年四年停貢舉

五年進士七十七人諸科八百九十四人省

元吳育狀元王堯臣

六年七年停貢舉

八年進士二百四十九人諸科五百七十三

人省元歐陽脩狀元王拱辰制科二人拔

萃二人

九年停貢舉拔萃四人

明道元年二年並停貢舉

景祐元年進士四百九十九人諸科四百八十一人制科三人拔萃四人省元黃庠狀元張

唐卿

二年三年四年並停貢舉

寶元元年進士三百一十人諸科六百一十七人

制科二人省元范鎮狀元呂溱

二年康定元年慶厯元年並停貢舉

慶厯二年進士四百三十五人省元楊寔狀元同

制科一人

三年四年五年並停貢舉

六年進士五百三十八人諸科四百一十五

人制科一人省元裴煜狀元賈黯

七年八年並停貢舉

皇祐元年進士四百九十八人諸科五百五十人

制科一人省元馮京狀元同

二年三年四年並停貢舉

五年進士五百二十人諸科五百二十二人

省元徐無黨狀元鄭獬

至和元年二年嘉祐元年並停貢舉

嘉祐二年進士三百八十八人諸科三百八十九

人省元李寔狀元張衡制科一人

是年始定間歲一開科

四年進士一百六十五人諸科一百八十四人省元劉摯狀元劉燁制科二人

六年進士一百八十三人諸科一百二人省元江衍狀元王俊民

八年進士一百九十三人諸科十一人省元孔武仲狀元許將

英宗治平二年進士二百人諸科十八人制科二人省

元彭汝礪狀元同

是年始詔三歲一科舉

四年進士二百五十人諸科三十六人省元
許安世狀元同

神宗熙寧三年進士二百九十五人省元陸佃狀元葉
祖洽明經諸科四百七十二人制科二人
六年進士四百人諸科四十人省元邵剛狀
元余忠

九年進士四百二十二
人諸科一百九十四

人省元張嶽狀元

闕

元豐二年進士三百四十八
人省元朱浚明狀元

時彥

五年進士四百四十五
人明經二人省元劉

棨狀元黃裳

八年進士四百八十五
人省元焦蹈狀元同

是歲諒闇
不臨軒

哲宗元祐三年進士五百二十三人制科一人省元章

授狀元李常寧

六年進士五百一十九人省元鄒起狀元馬

洵制科三人

紹聖元年進士五百一十二人省元劉範狀元畢

漸制科三人宏詞科八人

四年進士五百六十四人省元汪革狀元何

昌言詞科九人

元符三年進士五百六十一人省元李釜狀元同

是歲諒闇
不臨軒

徽宗崇寧二年進士五百三十八人省元李階狀元霍

端友

五年進士六百七十一人省元吳佃狀元蔡

疑

是科始罷諸州發解併省
試並從學校逐年貢士

大觀三年進士六百八十五人宗室上舍四十二

人上舍魁李彌遜狀元賈安宅

政和三年進士七百一十三人上舍魁師驥狀元

莫儔

五年進士六百七十人宗子上舍十七人上

舍魁傅崧卿狀元何棖

八年進士七百八十三人上舍魁何奎狀元

王嘉

宣和三年進士六百三十人上舍魁宋齊愈狀元

何渙

六年進士八百五人省元楊椿狀元沈晦

是年復省試

右汴宋九朝一百六十有七年科場取士總目
具載于此名臣碩輔皆由是出亦彬彬乎其盛
矣孰謂科目不足以得士哉

宋戶口總數

太祖建隆元年戶九十六萬七千三百五十三

乾德元年荆南平得戶十四萬二千三百

湖南平得戶九萬七千三百八十八

三年蜀平得戶五十三萬四千二十九

開寶四年廣南平得戶十七萬二百六十三

八年江南平得戶六十五萬五千六十五

九年天下主客戶三百九萬五百四

詔諸州歲奏男夫以二十爲丁六十爲老女

口不預

太宗雍熙元年令江浙荆湖廣南民輸丁錢以二十成

丁六十人老并身有疾廢者免之

至道元年詔復造天下郡國戶口版籍

自唐末四方兵起版

籍亡失故戶口賦稅莫能周知至是始命復造焉

三年天下主客戶四百一十三萬二千五百

七十六

真宗天禧五年天下主客戶八百六十七萬七千六百

七十七口一千九百九十三萬三百二十

仁宗天聖七年天下主客戶一千一十六萬二千六百

八十九口二千六百五萬四千二百二十八
慶厯八年天下主客戶一千七十二萬三千六百
九十五口二千一百八十三萬六十四

嘉祐八年天下主客戶一千二百四十六萬二千
三百一十七口二千六百四十二萬一千
六百五十一

英宗治平三年天下主客戶一千二百九十一萬七千
二百二十一口二千九百九萬二千一百

八十五

神宗熙寧八年天下主客戶一千五百六十八萬四千
五百二十九口二千三百八十萬七千一
百六十五

元豐六年天下主客戶一千七百二十一萬一千
七百一十三口二千四百九十六萬九千
三百

哲宗元祐六年天下主客戶一千八百六十五萬五千

九十三口四千一百四十九萬二千三百

一十一

元符二年天下主客戶一千九百七十一萬五千
五百五十五口四千三百四十一萬一千
六百六

徽宗崇寧元年天下主客戶三十萬三千四百九十五
口四十萬九千一百六十三而古今戶口
之繁無踰于是矣

按馬端臨曰古者戶口少而皆才智之人後世
生齒繁而多窳惰之輩均是人也古之人方其
爲士則務學問及其爲農則勤稼穡及其爲兵
則力戰鬪是以千里之邦萬家之聚皆足以世
守其國後世之民才益乏而智益劣士拘於文
墨而授之介冑則慚農安於犂鋤而問之刀筆
則廢以至九流百工釋老之徒食土之毛者日
以繁夥不足以增重邦國官既無藉於民之材

而徒欲多爲之法以征其身戶調口賦日增月益而民益窮苦憔悴祇以丁多爲累矣悲夫

宋財賦總數

按文獻通考國初以來四河所運粟未有定制至太平興國六年汴河歲運江淮米三百萬石菽一百萬石黃河粟五十萬石菽三十萬石惠民河粟四十萬石菽二十萬石廣濟河粟十三萬石凡五百五十二萬石非水旱大蠲民租未嘗不及其數至道初汴河運米至五百

八十萬石自是京城積粟盈溢大中祥符初至七百萬石天禧末京城所積倉粟一千五百六十萬餘石草一千七百萬五千餘圍凡水運自淮南江南荆湖南北路所運粟於揚真楚泗州四處置倉以受其輸既而分調舟船汴流入京師發運使領之荆湖江淮兩浙以及嶺表金銀香藥犀象百貨亦同之惟嶺表陸運至虔州而後水運陝西諸州救粟自黃河三門汭流由汴河而至亦置發運使領之陳頴許蔡光壽等六州之粟帛

由石塘惠民河而至京東十七州之粟帛由廣濟河而至皆有京朝官廷臣督之凡三水皆通漕運而歲計所賴者惟汴流焉河北衛川東北有御河達乾寧軍其運物亦有廷臣主之川陝諸州金帛自劔門列傳置分輦負擔以至租布及官所市布由水運送江陵自江陵遣綱吏運送京師咸平中定歲運六十六萬足分爲十綱天禧末水陸上供金帛緡錢二十三萬一千餘貫兩端足珠寶香藥二十七萬五千餘斤諸州歲造運船至道

末三千三百三十七艘天禧末減四百二十一 景德
中漕東南粟歲不過四百五十萬石後增至六百萬天
聖中發運使請所部六路計民稅一石量糴粟二斗五
升歲可更得二百萬石給京師仁宗曰常賦外增糴是
重擾民不許時江南穀貴民貧尚書員外郎吳耀卿以
爲言詔歲減五十萬後是三司奏復增至六百萬然東
南災歟輒減歲漕數或百萬或數十萬又轉移以給他
路者時有焉 慶厯中詔減廣濟河歲漕一十萬石後

黃河歲漕益減耗纔運菽三十萬石而歲創漕船市材木役牙前勞費甚廣嘉祐四年詔罷所運菽減漕船三百艘自是歲漕三河而已

葉少蘊石林燕語 皇祐治平天下財賦歲入皆一億萬以上歲費亦一億萬以上出入畧相當景德官一萬餘員皇祐治平加二萬餘員景德郊費六百萬皇祐治平加一千萬以上二者皆倍於景德元豐中曾子固嘗請欲推考所從來悉爲裁損

使歲入如皇祐治平而祿吏奉郊之費同景德止
二者所省已半以類推之歲入以億萬爲率歲但
省十之一則三十年當有九億萬可以爲十五年
之蓄議格不行此雖論其大約未必盡然要之言
節用似當略倣此可得實效愈於毛舉目前瑣碎
徒爲裁減之名而訖不能行也

沈括夢溪筆談 發運司歲供京師米以六百萬
石爲額淮南一百三十萬石江南東路九十九萬

一千一百石江南西路一百二十萬八千九百石
荆湖南路六十五萬石荆湖北路三十五萬石兩
浙路一百五十萬石通餘羨歲入六百二十萬石

汴京遺蹟志卷十二